

Nada nobo den caso di Natalee Holloway

ORANJESTAD (AAN): — Relaciona cu e tantísimo rumornan cu ta circula tocante e mucha muher Mericano Natalee Holloway, alto mando policial y fiscal mayor a tene un conferencia di prensa ayeranochi den e asina yama Sala di Comando.

E conferencia a worde habri pa vocero policial Comenencia, kende a presenta fiscal mayor mr. Carin Janssen y alto comisario Jan van der Straaten di distrito di Noord. Fiscal Mayor a bisa cu ta cuatro dia caba di desaparicion di Natalee y a agrega cu Aruba henter ta sinti pa famia di e mucha muher.

Na e momentonan aki no tin nada concreto pa indica cu lo



ta trata di un crimen, pero no por excluí esaki. DIARIO tin contacto cu e famia pa pone nan altura di e desaroyonan.

Fiscal Mayor a splica cu autoridadnan a inicia cu un buskeda grandi, den cual a participa Kustwacht, Polis, militarnan y Search & Rescue.

E buskeda no a produci ningun resultado, indicacion o evidencia y lo sigui cu e investigacion.

Ta masha difícil pa e dreña den detayenan di e investigacion, asina mr. Janssen a bisa.

Comisario Van der Straaten a agrega na su turno cu Polis a participa den e buskeda cu 16 persona.

Locual ta e famia tur dia ta pone nan altura di e ultimo desaroyonan di e investigacion, loke ta comprensible ya cu e ta trata di nan yiu.

Emocionnan ta grandi cerca

nan, pero mester busca e berdad kico a socede.

Tur tips cu dreña ta wordo averigua y atendi, pero e tip di oro ainda no kier yega, asina Van der Straaten a bisa.

En general por a constata cu durante e conferencia di prensa, no tabatin nada concreto y nobo.

E Comisario tabata masha breve y a gradici tur esnan cu ta duna tipnan pa localiza Natalee.

Tabatin pregunta di parti prensa tocante e hecho cu den principio Polis a scucha tres persona y cu ayera tabata circulando informe cu nan lo worde busca atrobe.

Fiscal Mayor a duna como contesta riba esey cu e investigacion ta apunta cu kende nan a mira Natalee, cu kende e tabata tin contacto,



kico tabata su ruta, cu kende el a papia.

Segun Fiscal: “Nos a scucha un par di hende, pero ainda no tin un bista completo. E punto cardinal di henter e investigacion no ta cla y no ta excluí cu por bay over pa detencion”.

Te awor aki sinembargo, no tabatin ningun detencion, esey tabata contesta categorico di Fiscal Mayor ayera nochi.